

# A Mugana Raukea i Herea e Petrus

## A Nita Vakalohoka

A viri i herea a raukea iea, e Petrus (1:1), a apostolo ne Isu Kristo (Mrk 3:16), a matakari na tara ne Kristo (Mat 16:16-19; 1Ko 9:5; Gal 1:18).

E Petrus i herea ra raukea iea na tahuna i made o Rom, ra ni gale kalahihi e Babilon (5:13). I here muga popote ne ia ni gi rabalaki ne AD 65, na parava e Nero i rabalaki e huriki ri luhoi tora e Kristo.

A vuhuna raukea iea ni here, ge vakatora e huriki ri bole a maregoa i kupo, a vuhuna ri luhoi torea e Kristo (1:6; 2:19-21; 3:14-17; 4:1; 5:12-19). E Petrus i here lakea ne ria, i ngaru ni vakalohoka ria vona a velenga kamumu ne Isu Kristo, ra i mate, i mahuri mule, bara i hamule valai tabu (1:3-12). Ra i maea, ri gi pesi tora na tahuna a maregoa, a nitoni legelege i bele ne ria. A vuhuna bara ri bole a mapa na tahuna e Isu Kristo ge hamule valai. I taki ria tabu maea, ri gi laho manga ria a tara ne Kristo.

---

## A Nita Muga

**1** <sup>1</sup>Iau e Petrus, a apostolo ne Isu Kristo.

A here lakene mua e huriki a Vure i vulaki mua, mu made manga mosi na provins e Pontus, e Galesia, e Kapadosia, e Asia, e Bitinia. <sup>2</sup>A Vure, e Tamane Hita, i lohoka muga pali ge vulaki mua. A Hanuna Vure i vulaki mua, ge mua ne vona kunana, mu gu longototo e Isu Kristo, a darana ge vahilolo mua, mu gu malamala.

A Vure ge rata kamumu mua, ge habi ne mua a nivalemu, ge uka harena.

## Si Pasimata Vona a Nimahuri Vakaroro

<sup>3</sup>Si gi kavurikea a Vure, e Tamane Isu Kristo, a Bakovi Dagi ne hita! I dodo hateka hita, lakea i habi ne hita a nimahuri karaba. Ngane si

---

<sup>a</sup> 1:2 Nim 24:1-11; Rom 8:29; 2Tes 2:13

pasimata muholi, a vuhuna e Isu Kristo i mahuri mule na matenga. <sup>4</sup>*b*Si pasimata vona a maki ni kado puru ne hita meli na hunu. A maki nga, ri gi tabuli vakaroro. I uka ma ri gi hale, i uka ma ri gi lobo. <sup>5</sup>*c*Mu luhoi torea pali e Kristo, lakea a nitora na Vure i matakari mua. Ge matakari mua ge vano ge harena na nilobona parava na tahuna ge vakasiri kavakava ne huriki a naro i korimule mua vona.

<sup>6</sup>*d*I mavonga, mu vivi hateka. Pali i muholi, ngane bara mu bole a nimadihi na nitoni legelege na parava popote kunana. <sup>7</sup>*e*Mu gu bole taro a nimadihi na nitoni legelege, ge vakasiri mu luhoi tora muholi. A gol a maki i uka ma ge tabuli vakaroro. Pali ia tara, ni toni na kanono. I mavonga, a niluhoi ne mua, ra i dagi hateka na gol, ni gi toni taro, ge tabuli tabaka. Na tahuna mu bole a nitoni, pali mu pesi tata ni luhoi tora, bara ni kavurike mua, bara ni vakabagetu mua, bara ni togo mua na tahuna e Isu Kristo i bele kavakava. <sup>8</sup>*f*I uka ma mu masia hosi, pali mu ngaru hatekea. I uka ma mu masia ngane, pali mu luhoi tora ia, mu vivi hateka. A nivivi ne mua i rangi a nivivi lobo na malala, i uka ngava ge tuvevea a nivivi ne mua, <sup>9</sup>*g*a vuhuna a mapane mua mu luhoi torea e Kristo, bara i korimule mua.

<sup>10</sup>*h*E huriki a propet ri ta muga vona a naro a Vure ta ge rata kamumu mua vona. Ri ngaru hateka ni lohoka vona a Vure ge korimule navai hita. <sup>11</sup>*i*A Hanune Kristo i leho pololilo ne ria, ri ta muga na nimadihi ta ge bolea e Kristo, a bagetuanga ta ge bolea muri, lakea ri ngaru ni lohoka vona ia e rei, pali garika ge valai? <sup>12</sup>*j*Ni vakalongo ria vona a nita propet ri rata i uka ma ne vona ni korimule ria. A nita propet ri ratea ne vona ni kori mua. A nita propet ne ria i bele muholi na ngava ni vakalongo ne mua pali, na tahuna e huriki ri vara ne mua a Velenga Kamumu na nitora na Hanu Kiripiripi, ra i valai na hunu. E huriki a agelo ranga, ri ngaru ni lohoka vona a ngava nga.

### Si Gi Made Malamala

<sup>13</sup>*k*I mavonga, mu luhoi kamumu, mu matakari a nilaho ne mua. Mu pasimata vona a naro kamumu a Vure ge rata virihi mua vona na tahuna e Isu Kristo ge hamule valai, ge bele kavakava ne huriki lobo. <sup>14</sup>*l*Naha ni longototo a ningaru hosi na kakaine mua, ra mu ramai hosi na tahuna i uka ma mu lohoka, a vuhuna ngane mua e huriki a tuna Vure, mu longototoa. <sup>15</sup>*m*A Viri i gale mua i malamala. I mavonga, mua ranga, mu laho malamala na maki lobo mu rata, <sup>16</sup>*n**o*a vuhuna ni here hosi i maea, “Mu ramai a naro ge kiripiripi, a vuhuna iau a kiripiripi.”

<sup>b</sup> 1:4 Kol 1:12   <sup>c</sup> 1:5 Ion 10:28; 17:11   <sup>d</sup> 1:6 Iak 1:2; 1Pe 5:10   <sup>e</sup> 1:7 Snd 17:3; Sek 13:9; Mal 3:3; Iak 1:3   <sup>f</sup> 1:8 Ion 20:29; 2Ko 5:7   <sup>g</sup> 1:10 Mat 13:16-17   <sup>h</sup> 1:11 Sng 22; Ais 53; Luk 24:26-27   <sup>i</sup> 1:14 Rom 12:2; Epe 2:3; 4:17-18   <sup>j</sup> 1:16 Levi 11:44-45; Mat 5:48

<sup>17</sup><sup>k</sup>A Viri mu vasileki vona, e Tamane hita, i pelekado e huriki lobo na naro i taku kunana, i pelekado ria i ramai a narone ria. I mavonga, mu mangenge na Vure, mu laho kamumu manga a mosi koea na malala. <sup>18</sup>A Vure i konamule mua na maka naro tavulavula mu bole ne huriki a gare ne mua. I uka ma i konamule mua na mahala ge lobo, manga a silva o a gol. <sup>19</sup><sup>l</sup>I konamule mua na mapana i dagi hateka, ra darane Kristo. I manga a darana tuna sipsip gavutuvutu. <sup>20</sup><sup>m</sup>A Vure i vulaki mugea na malala ni ratarike. Pali i bele kavakava ne mua ngane, na nilobona parava. <sup>21</sup><sup>n</sup>I rata mua mu luhoi torea a Vure. Mu luhoi tora ia, mu lohoka vona ge korimule mua, a vuhuna i vakamahuri mulea na matenga e Kristo, i vakabagetua.

<sup>22</sup><sup>o</sup>Naha ni tamilalu. Mu vangaru muholi na naro kiripiripi, i manga mua a maki tari, a vuhuna mu longo pali a ngava muholi, i rata a hanune mua i malamala pali. <sup>23</sup>Mu vangaru a vuhuna mu bole pali a nimahuri karaba. A nimahuri karaba iea i uka ma ge lobo. Bara i tabuli vakaroro. I valai na nita mahuri na Vure. A nita iea bara i tabuli vakaroro. <sup>24</sup><sup>p</sup>I manga a ngava ni here na Hinere, i maea,

“E huriki a bakovi a ngatavine ri manga a varili kunana.

A bagetua ne ria i manga a bagetua na keke.

A varili bara i malai, a keke bara i mapasi.

<sup>25</sup> Pali a Nitane Bakovi Dagi bara i tabuli vakaroro.”  
A nita iea, a Velenga Kamumu ni vara mua vona.

### A Kedo Mahuri

**2** <sup>1</sup><sup>q</sup>I mavonga, mu lobo liu ni rata a naro hale. Mu lobo ni tatami, mu lobo ni ngava naru, mu lobo ni tahate ne huriki ri tahoka a maki, mu lobo ni vakahale a rana turane mua. <sup>2-3</sup><sup>r</sup>Ge muholi mu hataki pali a naro kamumu ne Bakovi Dagi, mu ngaru hateka a nita na Vure, i manga a koma kiroko, ni poda karaba, i ngaru hateka ni ruru. Muri bara mu korurike, a Vure ge korimule mua.

<sup>4-5</sup><sup>s</sup>E Kristo i manga a kedo mahuri, ri koi vona e huriki a bakovi. Pali a Vure i vulakia, i ngaru hatekea. Na tahuna mu valai ne Kristo, mua ranga mu manga a kedo mahuri. Ni ru palupu mua, mu bele manga a roho na Vure, ge mua e huriki a prister na Vure, mu gu habi na Vure a nihabi ge vivi vona, a vuhuna a leho i ratea e Isu Kristo. <sup>6</sup><sup>t</sup>A Hinere i ta maea,

“A ru puru o Sion a kedo.

<sup>k</sup> 1:17 Rom 2:11; Kap 2:23 <sup>l</sup> 1:19 Apo 20:28; Hib 9:12-14

<sup>m</sup> 1:20 Epe 1:4; 2Tim 1:9-10 <sup>n</sup> 1:21 Ion 14:6; Rom 5:1-2 <sup>o</sup> 1:22 Ion 13:34; Rom 12:10

<sup>p</sup> 1:24-25 Ais 40:6-8 <sup>q</sup> 2:1 Epe 4:22; Iak 1:21 <sup>r</sup> 2:2-3 Sng 34:8 <sup>s</sup> 2:4-5 Epe 2:21-22; Kap 1:6 <sup>t</sup> 2:6 Ais 28:16; Epe 2:20

Ia a vuhu kedo a vulakia. A ngaru hatekea.

E rei a viri i luhoi tora ia  
i uka ma ge maruhu.”

<sup>7</sup>“Lakea mua e huriki mu luhoi torea a kedo iea, mu ngaru hatekea. Pali e huriki i uka ma ri luhoi torea, a Hinere i ta maea,

“A kedo i marikoi vona e huriki a mari ni hae a ruma,  
i bele manga a vuhu butu.”

<sup>8</sup>“I ta maea tabu,

“A kedo iea i rata e huriki ri sibo,  
ri boru.”

Ri sibo a vuhuna ri longotaroa a nitana, i manga a hini a Vure i taki muga ri gi rata. <sup>9</sup>“Pali mua, a Vure i vulaki mua. Mua e huriki a prister na hariki, a tara malamala, ne vona a Vure kunana. A Vure i rata mavonga, mu gu vakasiri e huriki vona a Vure i kamumu hateka, a vuhuna muga mu made na uvo. Pali i gale tala mua, mu gu made na nipara kamumu vona. <sup>10</sup>“I muga mu manga a bakovi a ngatavine tavula. Pali ngane mua e huriki a bakovi a ngatavine na Vure. I muga i uka tara viri ge dodo mua. Pali ngane a Vure i vakasiri pali ne mua a nidodo vona.

<sup>11</sup>“Mua o huriki a turagu, mu manga a mosi, mu laho polo kunanea a malala iea. A taki tora mua mu gu pile a ningaru hale na kakaine mua. A ningaru hale nga ri vaubi na hanune mua. <sup>12</sup>“Mu laho malamala na matane huriki ri made na uvo. Lakea na tahuna ri padi virihi mua, ta mu rata a naro hale, bara ri matakilaka vona a naro malamala ne mua. Muri bara ri kavurikea a Vure na Parava i valai vona.

<sup>13</sup>“Mu longototo a matakari lobo koea na malala, a vuhuna e Bakovi Dagi i ngaru si gi rata mavonga. Mu longototoa a hariki i matakari. <sup>14</sup>“Mu longo tabu e huriki a matakari, ra i rudu a hariki ge vakamadihi e huriki ri rata a naro hale, ge kavurike e huriki ri rata a naro kamumu. <sup>15</sup>“A Vure i ngaru mu gu longototo ria. Na naro iea, bara mu tukari a ngavane huriki a bakovi manga manga. <sup>16</sup>“I muholi i uka ma mua a vora. Pali mu laho manga a vora na Vure, mu ramai a ningaru vona. Naha ni rata a naro hale. <sup>17</sup>“Mu togo e huriki lobo. Mu ngaru e huriki e turane hita. Mu mangenge na Vure. Mu togoa a hariki.

### A Vorakato

<sup>18</sup>“Mua o huriki a vorakato, mu longototo, mu togo e huriki a matakari ne mua. Ria a bakovi navai, mu longototo ria. Ge ria a bakovi kamumu, a bakovi madoru, o ge ria a bakovi hale, mu longototo ria. <sup>19</sup>“A viri i luhoi

<sup>u</sup> 2:7 Sng 118:22    <sup>v</sup> 2:8 Ais 8:14    <sup>w</sup> 2:9 Vin 7:6; 14:2; Ais 9:2; Apo 26:18; Epe 5:8

<sup>x</sup> 2:10 Hos 2:23    <sup>y</sup> 2:11 Gal 5:17,24    <sup>z</sup> 2:12 Mat 5:16    <sup>a</sup> 2:13 Tit 3:1    <sup>b</sup> 2:15 1Pe 3:16

<sup>c</sup> 2:17 Rom 12:10    <sup>d</sup> 2:18 Epe 6:5

torea a Vure, lakea i bole tavula a nimadihi, i uka ma i rata a naro hale ge bole a nimadihi vona. Ia ge kaloho kunana, i rata a naro kamumu. <sup>20</sup><sup>e</sup>Mua bara mu rata a naro hale, ni lagu mua, pali mu kalohoa, ni gi kavurike navai mua? Pali mua bara mu rata a naro kamumu, ni lagu mua, mu kalohoa, a Vure bara i vivi ne mua. <sup>21</sup><sup>f</sup>I gale mua mu gu rata mavonga, a vuhuna e Kristo tara i bole a nimadihi na murine mua, mu gu muri mai a narona. <sup>22</sup><sup>g</sup>I uka ma i ratea tara naro hale. I uka ma i ratea tara ngava taminga. <sup>23</sup><sup>h</sup>Na tahuna e huriki ri harogia, i uka ma i koli. Na tahuna i bole a nimadihi, i uka ma i ta vakamengenge. I ru kunana ia na limana Viri i pelekado e huriki na naro malamala. <sup>24</sup><sup>i</sup>Na tahuna i tavore na kai tavalavala, i bole na kakaina a naro hale ne hita. I rata mavonga, si gi mate na naro hale, si gi mahuri mule na naro malamala. A harena lebo na kakaina i vakatavaga mua. <sup>25</sup><sup>j</sup>I muga mu manga a maka sipsip ri ruru. Pali mu hamule pali na Matakari na hanune mua.

### A Mata Girihina

**3** <sup>1</sup><sup>k</sup>Mua o huriki a ngatavine, mua ranga, mu longototo e girihine mua. Bara mu rata mavonga, bara ri pulo a vilone ria e girihine mua i uka ma ri luhoi torea a nita na Vure. I uka ma ni gi vara ria, pali bara ri pulo a vilone ria na tahuna ri matai a naro kamumu ne girihine ria, <sup>2</sup><sup>ra</sup>naro ni togo, a naro malamala. <sup>3</sup><sup>l</sup>Nahea mu gu roe vona a maki polovavo ga bagetua ne mua, manga a naro ni kolo tata a vune mua, ni rodo a gol, ni rodo a maki kamumu hateka. <sup>4</sup><sup>A</sup> bagetua ne mua ge valai pololilo na hatene mua, manga a naro ni vakakiroko mua, ni made madoru. A Vure i ngaru hateka a bagetua maea. I uka ma ge lobo. <sup>5</sup><sup>E</sup> huriki a ngatavine malamala ri luhoi tora a Vure hosi, ri rata maea. A bagetua ne ria, ri longototo e girihine ria. <sup>6</sup><sup>m</sup>E Sara i longototoa e Abraham, i galea a bakovi dagi vona. Bara mua e huriki a ngatavine kamumu manga e Sara na tahuna i uka ma mu mangenge vona a maki tara, mu rata a naro kamumu.

<sup>7</sup><sup>n</sup>Mua o huriki a bakovi ranga, mu lohoka vona e huriki a ngatavine i uka ma ri tuhaka. Mu made kamumu turana e girihine mua. Mu togo ria, a vuhuna ria ranga, ri gi bole na Vure a nimahuri vakaroro. I uka ma mu gu rata mavonga, a Vure i uka ma ge longo a nivasileki ne mua.

### E Huriki Lobo

<sup>8</sup><sup>I</sup> pali. Mua lobo mu pesi na niluhoi i taku kunana. Mu vadodo. Mu vangaru i manga mua a maki tari. Mu valemu. Mu vakakiroko mua. <sup>9</sup><sup>A</sup>

<sup>e</sup> 2:20 1Pe 3:14,17   <sup>f</sup> 2:21 Mat 16:24; Ion 13:15   <sup>g</sup> 2:22 Ais 53:9   <sup>h</sup> 2:23 Ais 53:7;  
1Pe 3:9   <sup>i</sup> 2:24 Ais 53:5-6; Rom 6:11   <sup>j</sup> 2:25 Ese 34:5-6; Mat 9:36; Ion 10:14; Hib 13:20-21  
<sup>k</sup> 3:1 Epe 5:22   <sup>l</sup> 3:3 1Tim 2:9   <sup>m</sup> 3:6 Vuh 18:12   <sup>n</sup> 3:7 Epe 5:25

viru ge rata hale mua, naha ni koli. A viru ge harogi mua, naha ni koli. Pali mu gamai ria, a vuhuna a Vure i gale mua mu gu rata mavonga, lakea mua ranga, bara ni gamai. <sup>10</sup>°I manga a ngava ni here na Hinere,

“E rei a viru i ngaru a nimahuri,

i ngaru ni made kamumu,

ge matakaria a tabelena, i uka ma ge rata a ngava hale,

ge matakari a ngavana, i uka ma ge tatami.

<sup>11</sup> Ge ngalahere na naro hale, ge rata kamumu kunana.

Ge toni a buluna ni made na nivalemu.

<sup>12</sup> A vuhuna e Bakovi Dagi i matakari e huriki a bakovi malamala, i longo a nivasileki ne ria.

Pali i gege e huriki ri rata a naro hale.”

<sup>13</sup> Mua bara mu leho tora ni ramai a naro kamumu, e rei ge rata hale mua? <sup>14</sup>°Pali bara mu laho malamala, lakea ni vakamadihi mua vona, a Vure bara i gamai mua. I mavonga, naha ni mangenge ne ria. Naha ni loho pae. <sup>15</sup> Pali mu togoa na hatene mua e Kristo, ia kikeri a Bakovi Dagi. Mu kisi mua, mu gu tuveve polo ne huriki ri nana mua, na ra maki mu pasimata vona. <sup>16</sup>°Na tahuna mu tuveve ne ria, mu togo ria, mu ta madoru. Mu laho malamala, i uka ma mu gu hataki manga mu tahoka a naro hale, lakea na tahuna e huriki ri padi momo tavula mua, bara ri maruhu, a vuhuna ri matai mua, mu rata a naro kamumu, a vuhuna mu rihi e Kristo. <sup>17</sup> A koi mu gu bole a nimadihi. Pali bara mu bole, nahea mu gu bole a vuhuna mu rata a naro hale. Mu gu bole a vuhuna mu rata a naro kamumu.

<sup>18</sup> E Kristo tara i bole a nimadihi. Ia a bakovi malamala, i mate balaka taku na naro hale ne hita, ge korimule e huriki a bakovi hale. I rata mavonga, ge tuli valai hita na Vure. A kakaina ni rabalaki, pali a Vure i vakamahuri mulea. <sup>19</sup> I vano, i vara ne huriki ri mate pali, ri made na bavi. <sup>20</sup>°Ri made vonga, a vuhuna hosi i uka ma ri longo mai a ngavane Noa, na tahuna a Vure i tabana ni hatenono, na tahuna e Noa i kisi a aga rungu vona. E huriki ala popote kunana ri dili na agarungu iea. A bakovi a ngatavine ala polotolu kunana a Vure i korimule ria na marungulolo vona. <sup>21</sup> A hilova tara i maea. I korimule mua. I uka ma ne vona ni vahilolo a kuline mua. E Kristo i mahuri mule na matenga, lakea i korimule mua na tahuna mu takia a Vure ge puga vuroki a naro hale ne mua. Ngane i uka ma mu gu hataki manga mu tahoka a naro hale. <sup>22</sup> I sike pali na hunu, i made na limana kanena Vure. I matakari e huriki a agelo, e huriki a matakari, a maka nitora ni habi na limana.

° 3:10-12 Sng 34:12-16    ° 3:14 Ais 8:12-13; Mat 5:10; 1Pe 2:20; 4:14    ° 3:16 1Pe 2:12  
 ° 3:20 Vuh 6-7

### Mu Vuroki a Naro Hale

**4** <sup>1</sup>A vuhuna e Kristo i bole a nimadihi na kakaina, mua ngane mu bole a niluhoi vona, mu dava ni bole a nimadihi. E rei a viri i bole a nimadihi na kakaina, i lobo pali ni ratena a naro hale. <sup>2</sup>I uka ma ge ramai tabu a ningaru hale na kakaina. Bara i nunu muri mai kunana a ningaru na Vure. <sup>3</sup><sup>t</sup>A hini hosi mu rata a maka naro hale, ngane i lobo. A naro hale nga e huriki i uka ma ri lohoka na Vure ri ngaru ni rata: i manga a naro na molenga, a naro ni ngutu na viri, a naro ni ninu a naru vagole, a naro ni vapopo, ni ninu hateka, a naro ni mole, a naro ni lakea na klab, a naro hale ni kavurike a vure ranga. <sup>4</sup>Ri turutu na tahuna mu koi ni turane ria ni rata a naro hale nga, lakea ri harogi mua. <sup>5</sup><sup>u</sup>Pali muri ma, bara ri pesi na matana Viri ge pelekado a narone huriki ri mahuri, e huriki ri mate pali, ri takia i navai ri rata a maka naro ri rata. <sup>6</sup>I mavonga, a Velenga Kamumu ni vara pali ne huriki ri mate muga ne Kristo, i bele. Ri mate manga hita lobo bara si mate, pali ngane i mahuri a hanune ria, i manga a Vure.

<sup>7</sup><sup>v</sup>A malala i tabukoi ge lobo, i mavonga, mu matakari kamumu a ningaru ne mua, mu matadoko, mu gu kara ni vasileki. <sup>8</sup><sup>w</sup>A maki dagi hateka, mu gu tabana ni vangaru muholi, a vuhuna na tahuna mu vangaru, bara i kavitagu a naro hale i kupo. <sup>9</sup><sup>x</sup>Mu bole dili na ruma ne mua e huriki a turane mua, mu matakari ria, naha ni marikoi. <sup>10</sup><sup>y</sup>Mu matakari kamumu a nitora legelege a Vure i habi ne mua. Mu vakori na nitora nga. <sup>11</sup>E rei a viri i moro ni ta, ge ta manga a Vure i habia a ngava vona. E rei a viri i moro ni kori e huriki, ge kori na nitora a Vure i habia vona. Mu rata mavonga, a maki lobo mu rata bara i habi a bagetua na Vure polo ne Isu Kristo. A bagetua lobo, a nitora lobo, ge ne vona kunana vakaroro.

### A Nimadihi

<sup>12</sup>Mua o huriki a turagu, a maka nitoni dagi bara ri valai, ri toha mua manga a kanono. Naha ni turutu manga a maki maea i uka ma ge bele. <sup>13</sup><sup>z</sup>Na tahuna ri bele, mu vivi, a vuhuna mu bole a maregoa i manga e Kristo i bole a maregoa. Muri bara mu vivi hateka na tahuna a bagetuanga vona i bele kavakava. <sup>14</sup><sup>a</sup>Na tahuna e huriki ri harogi mua a vuhuna mu luhoi torea a rane Kristo, mu vivi, a vuhuna a Hanuna Vure i bagetu hateka i made turane mua. <sup>15</sup>Naha ni rabalaki a viri, naha ni panaho, naha ni rata a naro hale, naha ni rahi dili mua na maki na viri

<sup>s</sup> 4:1 Rom 6:2,7   <sup>t</sup> 4:3 Epe 2:2-3   <sup>u</sup> 4:5 Apo 10:42   <sup>v</sup> 4:7 Rom 13:11-12   <sup>w</sup> 4:8 1Pe 1:22

<sup>x</sup> 4:9 Hib 13:2   <sup>y</sup> 4:10-11 Rom 12:6-8   <sup>z</sup> 4:13 Apo 5:41; Iak 1:2; 1Pe 1:6-7

<sup>a</sup> 4:14 1Pe 2:20

tara. A naro nga ri hale. Bara mu rata a maki nga, mu bole a maregoa, i kamumu. <sup>16</sup>Pali a viri i bole a maregoa a vuhuna ia a Kristian, nahea ge maruhu. Ge kavurikea a Vure, a vuhuna ni gale ia a viri ne Kristo. <sup>17</sup>A parava i bele pali e huriki a tara na Vure ni gi pelekado. A nipelekado ge tubu ne hita, ge bele navai ne huriki i uka ma ri longototo a Velenga Kamumu na Vure?

<sup>18</sup><sup>b</sup>A Hinere i ta maea,

“I gutu ni korimule e huriki a bakovi malamala.

I mavonga, ge bele navai ne huriki a bakovi hale ri marikoi a Vure?”

<sup>19</sup>I mavonga, e huriki ri bole a maregoa na naro a Vure i vivi vona ri gi tabana ni rata a naro kamumu, ri gi ru mule ria na limana Viri i ratarike a maki lobo. I rata a maki lobo i taki ge rata.

### E Huriki a Matakari

**5** <sup>1</sup>Mua o huriki a gare na lotu, iau tara a gare. Iau a matai a maregoa i bolea e Kristo. Bara te vaveru vona a bagetuanga vona, ra ge bele kavakava muri ma. I mavonga, a taki tora mua, <sup>2</sup><sup>c</sup>mu matakari kamumu a kabu na Vure, ra ri made turane mua. Mu rata mavonga, i uka ma mu ramai kunana a nitagu. Nahea mu gu rata kunana a leho ni bole a moni. A naro iea, a naro ni maruhu vona. Mu matakari ria a vuhuna mu ngaru hateka ni rata, i manga a Vure i ngaru. <sup>3</sup><sup>d</sup>Naha ni matakari hateka a kabu na Vure. Mu muga ria, mu vakasiri a naro kamumu ne ria, ri gi ramai. <sup>4</sup>Muri, na tahuna a Matakari dagi i bele, bara i habi ne mua a mapa kamumu ge tabuli vakaroro.

<sup>5</sup><sup>e</sup>Mua o huriki a riau, mu longototo e huriki a gare ne mua. Mu vakakiroko mua, mu vakori, a vuhuna a Hinere i ta maea,

“E huriki ri bibi rike mule a rane ria, a Vure bara i gege ria.

Pali e huriki ri vakakiroko ria, a Vure bara i rata kamumu ria.”

<sup>6</sup><sup>f</sup>I mavonga, mu vakakiroko mua polotano na nitora dagi na Vure. Muri, na parava i vulakia, bara i kavurike mua. <sup>7</sup><sup>g</sup>Mu habi na limana a maki lobo mu loho lege vona, a vuhuna i ngaru hateka mua.

<sup>8</sup><sup>h</sup>Mu matapara, mu matadoko, a vuhuna a pile ne mua, e Satan, i laho viliha manga a laion i roro, i matakana a viri ge ratapilea. <sup>9</sup><sup>i</sup>Mu gegea, mu pesi tora na niluhoi tora, a vuhuna mu lohoka vona e huriki e turane mua na tabeke ranga na malala, ria ranga ri bole a nimadihi manga mua. <sup>10</sup>I mavonga, na tahuna mu bole pali a nimadihi popote, a Vure na nidodo bara i kisi mua, i vakatora mua, i rata mua mu pesi tora. Ra

<sup>b</sup> 4:18 Snd 11:31   <sup>c</sup> 5:2 Ion 21:15-17; Apo 20:28   <sup>d</sup> 5:3 2Ko 1:24; Pili 3:17; Tit 2:7

<sup>e</sup> 5:5 Snd 3:34; Epe 5:21; Iak 4:6   <sup>f</sup> 5:6 Mat 23:12; Luk 14:11; Iak 4:10   <sup>g</sup> 5:7 Mat 6:25-30

<sup>h</sup> 5:8 1Tes 5:6   <sup>i</sup> 5:9 Epe 6:11-13; Iak 4:7



Vure i rata kamumu mua, i gale mua mu gu made turana vakaroro na bagetuanga vona, a vuhuna mu luhoi torea e Isu Kristo. <sup>11</sup>A nitora lobo ge ne vona kunana vakaroro. I muholi.

#### A Nitalo

<sup>12</sup><sup>j</sup>E Sailas i manga e turagu muholi, i rata kamumu a leho lobo a habi vona. I kori iau, i here poloa a raukea kiroko iea, ra a vara mua, a taki tala ne mua a naro kamumu muholi na Vure. Mu pesi tora vona.

<sup>13</sup><sup>k</sup>A ngatavine ra i made o Babilon<sup>l</sup> i talo mua. Ia tara, a Vure i vulakia. E tugu e Markus tara, i talo mua. <sup>14</sup>Mu vatagui na naro kamumu ni vangaru.

Mua o huriki mu rihiki e Kristo, a nivalemu ge tabuli ne mua.

---

<sup>j</sup> 5:12 Apo 15:22,40    <sup>k</sup> 5:13 Apo 12:25; 2Tim 4:11    <sup>l</sup> 5:13 E huriki a bakovi na lohokanga ri takia ra ngatavine iea, a nita vakakika. I taki virihi e huriki a tara na Vure ri made o Babilon.